



Dasar Pendidikan Digital sedang dimuktamad [METROTV]

Siti Aminah Mohd Yusof
am@hmetro.com.my

Bukit Mertajam: Dasar Pendidikan Digital dalam peringkat akhir untuk dimuktamadkan sebelum dibentangkan di Parlimen.

Menteri Pendidikan Fadhlina Sidek berkata, pihaknya memerlukan sedikit masa untuk memperhalusi penggubalan dasar itu yang akan menjadi elemen penting dalam pengajaran dan pembelajaran murid di negara ini.

"Saya percaya apabila kita bentang dasar itu nanti, ia akan melengkapkan keseluruhan ekosistem pendidikan khususnya pendidikan digital negara.

"Kita jangka (bentang) dalam masa terdekat. Insya-Allah kita cuba sedaya upaya," katanya kepada pemberita selepas melancarkan projek kelas pintar di Sekolah Kebangsaan Mengkuang di sini, hari ini.

Terdahulu, Yayasan Aeon Malaysia (MAF) dengan kerjasama Yayasan Didik Negara (YDN) di bawah KPM melancarkan projek kelas pintar bagi membantu murid mendapatkan suasana pembelajaran terkini dan berkualiti.

Hadir sama, Pengerusi Aeon, Datuk Iskandar Sarudin; Presiden MAF Datin Noryahwati Mohamad Noh dan Ketua Pengarah Pendidikan Datuk Pkharuddin Ghazali.

Mengenai projek itu, Fadhlina berkata, ia membabitkan 40 sekolah dengan antara kriteria penting yang dipertimbangkan ialah sekolah mesti mempunyai majoriti murid B40.

"Kami di KPM mengalu-alukan kerjasama sebegini khususnya untuk komuniti pendidikan yang memberi manfaat kepada anak-anak," katanya.

MAF memperuntukkan RM2 juta untuk projek itu yang membabitkan 23,000 murid, serta dilaksana di 40 sekolah menengah dan rendah di Perlis, Kedah, Pulau Pinang, Perak, Kuala Lumpur, Selangor, Negeri Sembilan, Melaka, Johor dan Kelantan.

Ia akan membabitkan kerja menaik taraf infrastruktur serta kemudahan untuk mewujudkan persekitaran pembelajaran kondusif termasuk papan putih interaktif, penghawa dingin, perabot dan peralatan lain untuk bilik darjah.

Disiarkan pada: Mac 26, 2023 @ 4:29pm